

Anaia betaurrekodunari jarriak

I

Sarri susmoa izaten dugu
pentsatzera iritsita
kontrol betean bizi garela,
kutxa batean itxita.
Askotan entzun dugu guztiok
Anaia Handiaren zita.
Gaurko anaia handiak berriz
tontakeriak utzita
Orwell-en hura hazi egin du
betaurrekoak jantzita.



NAGORE LEGARETA

II

Baina anaia, nor da anaia
inoiz handi izan zena?
Betaurrekoen atzean datza
bere zelatari sena.
Gure lagunen, gure mezuen
kontrolatzaile zuzena,
gure agenda, gure argazki,
bideo eta gauzena...
Betaurrekoen itxura du ta
Google da bere izena.

III

Lehen bilatzaile soil bat zen bera,
azkarra eta mardula...
Nahi genuena ematen zigun,
azkarragorik sekula!
Lagun onentzat hartu genuen
ustekabeko pit-bull-a.
Ohartzerako ikusi dugu
sofan eseri zaigula...
Okerrena da etxe barrura
geuk gonbidatu dugula.

IV

Bilatzailetik ondoren Gmail
web-posta denen eredu:
Dokumentuak, Egutegia,
gero Youtube-ri heldu.
Talk-ez hitz egin eta Picasa-n
argazkietan gaude gu
eta gainera dena dohainik
zuhur / behartsuon zeru!
Eman, zerbitzu asko eman du
hartu, zer hartu ote du?

V

Monopolio kontu hau ez da
lehenengo aldiz aurkeztu:
Jende ugari jarri du dena
Bill Gates handiaren esku.
Betaurrekodun haren ihesi
sarean ginen babestu.
Hau esan eta nahiz ta ez egon
hura babesteko prestu:
hark aurpegi bat zuen atzean
honek hori ere ez du.

VI

Sare handira konektatuta
sentitzen gara askeak:
ez digu axola gure datuak
inoren esku uzteak.
Behar berriek sortzen dituzte
gehiengoaren eskeak.
Merezi al du gure bizitza
gorde asmotan hasteak,
lortu nahi badu lortuko badu
batek ez bada besteak?

DOINUA: Gure aurreko guraso zaharrak.